

Naqqiut

Siunnersuummut 18. maj 2020-imeersumut taarsiissut

(Naalakkersuisup akisussaasuusup taaguutaanik allanngortinneqarnera imarisaalu)

Nunat Avannarliit Killiit Siunnersuisoqatigiiffiata kaammattuutitut aalajangersagaanut nr. 2/2019-imut Inatsisartut tapersiinissaat pillugu Inatsisartut aalajangiiffisassaattut siunnersuut: Nunani Avannarlerni Killerni “Immamik Minguitsuutitsinermut Nersornaammik” pilersitsinissamik aningaasaliinissamillu taperseeqqullugit Savalimmiuni, Kalaallit Nunaanni aamma Islandimi Naalakkersuisut Nunat Avannarliit Killiit Siunnersuisoqatigiiffiannit kaammattorneqarput, taanna piujuaannartitsinermik tunngaveqarluni immamit pisuussutinik aqutsinissamik atuinissamillu kiisalu immami avatangiisit peqqissuunissaasa pisuussuteqarluarnissaasalu nukittorsarneqarnissaanik immikkut suliniuteqartunut iliuseqartunullu tunniunneqartassaaq.
(Aallartitat siulittaasuat Vivian Motzfeldt)

Akissuteqaat

(Suliffeqarnermut, Iisimatusarnermut Avatangiisinullu Naalakkersuisoq)

Siullermeernera

Imartanik immamilu isumalluutininik sapinngisamik pitsaanerpaamik atuinissamut illersuinissamullu qulakkeerisariaqartugut Naalakkersuisut isumaqataapput. Nunat Avannarliit Killiit Siunnersuisoqatigiiffiannit tikkuarneqartut, immamut tunngatillugu nunat avannarliit killiit immikkorluinnaq inissisimapput, aammalu imartani avatangiisit illersorneqarnissaannut imartanilu isumalluutininik piujuaannartitsisumik atorneqarnissaannut nunarsuarmi oqaluuserisassanik aalajangersaaqataasarpugut.

Taamaattumik Naalakkersuisut “Immamik Minguitsuutitsinermut Nersornaat” pillugu siunnersuut tapersorsinnaavaat. Kisiannili Naalakkersuisunit maluginiarneqarpoq, “Immamik Minguitsuutitsinermut Nersornaat”-ip pilersinneqarnissaanut aningaasalersorneqarnissaanullu nunani avannarlerni killerni pingasuusuni naalakkersuisut tapersiissappata, aningaasat suminngaanniit aaneqassanersut pillugu Nunat Avannarliit Killiit Siunnersuisoqatigiiffiat innersuussinermini isummersimangitsoq.

COVID-19 aningaasaqarnikkut annertuunik aammalu nunatsinni aningaasaqarnermi siunissaq pillugu nalorninartorsiortitsinermik annertunerusumik kinguneqarpoq. Taamaattumik nalornineq taanna tunngavigalugu suliniutinik aningaasaliiffiusariaqartunik aallartitsisoqassanngitsoq inassutigineqarpoq.

Siunnersuut pitsaasuugaluartoq, nunani avannarlerni killerni “Immamik Minguitsuutitsinermut Nersornaat”-mik pilersitsinissamut aningaasalersuinissamullu Covid-19-ip qaangiunnissaa utaqqineqassasoq, taamaalillunilu piffissami ajornartoorfiusumi siunnersuutinik aningaasartuuteqarfiusariaqartunik aallartitsisoqassanngitsoq Naalakkersuisunit inassutigineqarpoq.

Covid-19-ip kingunerisaanik Nunatta Karsiata naatsorsuutigisatut amigartoorsinnaanera
pissutigalugu Naalakkersuisut innersuussipput suliap naammassinissaanut
aningaasaliisoqarnissaa periarfissaalerpat pissasoq.

Matumuuna aalajangiiffigisassatut siunnersuut Inatsisartuni kajumittumik suliassanngorlugu
tunniuppara.